

CI ENCOUMENCE LI DIZ DE L'UNIVERSITEI DE PARIS

- Rimeir me couvient d'un contens *f. 82 v° 2*
Ou l'on a mainz deniers contens
Despendu et despendera :
4 Ja siecles n'en amendera.
Li clerç de Paris la citei
(Je di de l'Universitei,
Noumeement li Arcien¹,
8 Non pas li preudome ancien)
On empris .I. contans encemble :
Ja biens n'en vanrra, ce me cemble,
Ainz en vanrra mauz et anuiz,
12 Et vient ja de jors et de nuiz.
Est or ce bien choze faisant ?
Li filz d'un povre païsant
Vanrra a Paris por apanre ;
16 Quanque ces peres porra panrre
En un arpant ou .II. de terre
Por pris et por honeur conquerre²
Baillera trestout a son fil,
20 Et il en remaint a escil.
Quant il est a Paris venuz
Por faire a quoi il est tenuz
Et por mener honeste vie,
24 Si bestorne la prophecie³ :
Gaaig de soc et d'areüre
Nos convertit en armeüre.
Par chacune rue regarde
28 Ou voie la bele musarde ;
Partout regarde, partout muze ;
Ces argenz faut, sa robe uze :
Or est tout au recoumancier.
32 Ne fait or boen ci semancier.
En Quaresme, que hon doit faire
Choze qui a Dieu doie plaire,
En leu de haires haubers vestent

¹ La Faculté des Arts était toujours plus turbulente que les autres, comme on l'a vu à propos du conflit entre les séculiers et les Mendiants.

² Même vers dans *Plaies du Monde* 92.

³ Cf. Isaïe 2, 4 : *Et conflabunt gladios suos in vomere et lanceas suas in falces* (« Avec leurs épées ils forgeront des socs, avec leurs lances des faux »).

36 Et boivent tant que il s'entestent ; *f. 83 r° 1*
Si font bien li troi ou li quatre
Quatre cens escoliers combatre
Et cesseir l'Universitei :
40 N'a ci trop grant aversitei ?
Diex ! ja n'est il si bone vie,
Qui de bien faire auroit envie,
Com ele est de droit escolier !
44 Il ont plus poinne que colier
Por que il wellent bien aprendre ;
Il ne puent pas bien entendre
A seoir aseiz a la table :
48 Lor vie est ausi bien metable
Com de nule religion⁴.
Por quoi lait hon sa region
Et va en estrange païs,
52 Et puis si devient foulz naïz
Quant il i doit aprendre sens,
Si pert son avoir et son tens
Et c'en fait a ces amis honte ?
56 Mais il ne seivent qu'oneurs monte.

Explicit.

Manuscrit : C, f. 82 v°.

1. c. doou c. - 2. diu's c. - 8. preudoms

⁴ Cf. *Plaiës du Monde* 89-104.